

Mbanjlujgyah: Daj “Gungzhoj Boemhbad” Daengz Daegsaek Cunh Okmingz

鲁家村：从“又穷又邋遢”到特色名村

□ Vangz Cunghmenj Liuz Vwnzvaz

Naj coh Gamjluzdiz, laeng ing Dahvadauz, baenz baiz baenz coij ranzyouq daegsaek Gveiqbaek ciengz hau vax heu caeuq raemx Dahvadauz doxdaengh doxingi, gyoengq vunzmbanj youq ndaw ranz bonjfaenh aeuq “byadaehfouh” homrang biu doh seiqhenz yinx baengzyoux hekyouz caenx bae, gyoengq vunzlaux cix cwxcaih youqndwi dwk con bae gak ranz ganggoj……Gijneix dwg aen gingj vunzraeuz youq Mbanjlujgyah yawjraen ndeu.

Mbanjlujgyah dieg youq duenh gyang Dahvadauz Siufungh Gih Gveilinz Si, liz gyang singz Gveilinz ngamq 2 goengleix gyae, ing bya dep raemx, gingj gyaeu yinx vunz, aen gingj “ronghndwen seizcou Dahyangzgyangh” “bet gingj gaeuq” ciuhgonq Gveilinz neix couh youq gizneix, gij gingj cuengq doekgonq heiqlienzdaemh densi 《Sihyouz Gi》de couh youq gyaeujmbanj aeugingj, dwg aen mbanj okmingz daegsaek lijyouz Gveilinz comzrengz cauxguh ndeu. Daengx mbanj 64 ranz 390 lai vunz, gaxgonq dajveh lotlaeng, daengx cunh baijbouh luenhyab, raemxuq luenh baiz luenh bok, nyapnyaj luenh dong luenh ndek, mbouj miz maz souhaeuq, dwg aen mbanj “gungzhoj youh boemhbad” ndeu. Youq Minzgen Gveilinz Si Gihgen Cihbu haenqrengz doidoengh lajde, Gveilinz Si Siufungh Gih youq 2009 nienz dawz Mbanjlujgyah lied haeuq lajmbanj moq hwnjguh cungdenj hanghmoeg, bi daihngleih couh youq gih cwngfuj doengjit dajveh guh daengx mbanj yiengh mbanj gaijguh. Geij bi gvaqbae, daengx cunh 98 aen ranzyouq dingj lingq, vax heu, cueng guenghva, ciengz hau, luengq rinbenj comz doh le gij yiengh dajcaep ranzyouq Gveiqbaek conzduengj haenx baenz baiz baenz coij moqsag ndeyawj, loekraemx, funghranz guh daehfouh, aenmuhrin gvangjczangz, daemzngaeux, laeuzgyong, roqluengq faex doenghgiy gingjyawj caeuq fog faexheu loegvaq dem le giz ndeyawj, gizziz cungj yienh’ok gij cwkrom nanwt vwnzva daehfouh baenz bak bi aen mbanj neix.

Gyoengqvunz Mbanjlujgyah cungj geiq ndaej,

cib lai bi gaxgonq ngoenz he, Minzgen Gveilinz Si Gihgen Cihbu cujyin Cwngz Yenzvej daiq aen siengfap bang aen mbanj ndeu vut gungz baenz fouq haenx byaij haeuq le Mbanjlujgyah, ciemhciemh daiq aen mbanj neix byaij hwnj le diuz roen siugangh. Youq ndaw cib bi de, Cwngz Yenzvej cawz ra baihgwnz aeu ngaenz doidoengh gak hangh hongsaeh ndaw mbanj le, lij gonqlaeng ok ngaenz bonjfaenh 20 fanh maenz bang ndaw mbanj guh le 7 aen dinggwnggaiz daegsaek doenghgiy hongsaeh daiqdoengh vunzmbanj hwngfat haenx, swheij mbouj faen aeu saek faen ngaenzleih, ndaej vunzmbanj cwngguh “vunzmbanj rogbien”; de haeuq mbanj baez rox ndaw mbanj gaenq guh daehfouh baenz bak bi seiz, couh siengj banhfap soucomz ndaej bak lai cungj byaekyiengh daegsaek daehfouh, son gyoengq vunzmbanj guh dajcawj caeuq dinggwnggaiz dakdaih doenghgiy bonjsaeh ra ngaenz neix, menhmenh dwk, vunzmbanj da raeh uk lingz lo, boux riengz boux “swiq din hwnj haenz”, bienqbaenz le dinggwnggaiz lauxbanj roxnaeuz “daujyouz”, youq bakranz bonjfaenh banh hwnj le nungzgyahloz caeuq lijyouz. Seizneix, daengx mbanj ranzranz guh hangzgwnggaiz, aeu byaek lajmbanj guhcawj, bya daeufouh, gaeq daehfouh doenghgiy byaek daehfouh neix mingzdaez riuz doh singz Gveilinz.

Doenggvaq vwnzva, lijyouz, gai ngaiz fuzbinz, seizneix Mbanjlujgyah gaenq baenz Guengjsae raeuz aen mbanj moq guhyiengh miz daegsaek lijyouz youqndwi ndeu, ndaw cunh moix bi doi ok ciet hawfwen minzcuz “sam nyied sam” Siufungh Gveilinz daengi vwnzva binjbaiz, cungfaen baijyienj le gij rengzhoengh daegbied daehfouh Lujgyah doenghgiy gwnndoet vwnzva neix, ndaej baenz yiengh ndei swnghdai sevei cujyi lajmbanj moq, bingz haeuq Guengjsae raeuz buek daih’it 16 aen daegsaek mbanj okmingz ndawde aen ndeu, haujlai hekyouz cungj doxcaeh dwk bae ndaw mbanj youzcet cimzfeih.



▲ Hekyouz youq ndaw mbanj cetyouz ingjsiengq.



▲ Ndaw mbanj ngoenzngoenz lumj gvaq ciet nei nauhyied dangqamaz.



▲ Luengqhongh ndaw mbanj bingzbwd cinghseuq.



▲ Ndw n bakmbanj raen yiengh ndei.



▲ Yiengh dajcaep ranzyouq daegsaek yienhda.

► Giuzndojfwn vang gwnz Dahvadauz.



▲ Ngoenzciet foux lungzfiengz koh saedcej vuenyungz.

